

Vun driweriver

erscheint auf www.lenauheim.de

monatliche
Erscheinung

August 2013

von Helen Alba

Vum un iwer die Tuppe

Die Oma hat e tuppiche Anzuch ghat. Der war schwarz mit weiße Tuppe un is Sunntachs angezoo gin, wann se maje gang is. Es Kopptiechl un die Scherz ware ach getuppt. Die Mutter, die hat dann Kleider, Blusne un Reck mit verschiedenfarwiche Tuppe ghat. Ach Barchet, aus dem mer Schlofhimiter gemacht hat, war in seller Zeit tuppich. Später dann, sin die Tuppe stark in Modi kumm, je gresser un bunter se ware, umso mehr Aue han se angezoo. Sogar tuppiches Bettzeich is IN.

Tuppe kann mer a im Gsicht han, oder uf der Haut. Es git gsaat, des seie Ausschläch, die was dann kumme, wann mer esse tut, was mer nit vertraat. Tuppich sin ach die Kiner, wann se Reedle, Schofbloodre han.

Doch mer kann ach tuppe, wann mer sich mitm Finger an de Kopp tuppt, des heescht sovill, das was locker is, dass e Brett los is, dass mer nit alles beinander hat usw. Un neierlich tuppt mer mit de Fingre uf dem Läpi (Laptop) rum. Der Läpi is e ganz moderne Computer, de mer schnurstracks un iwerall hin mitholle kann. Mer tuppt iwerm Schreiwe un tuppt solang rum, bis mer in der ganzi Welt rum kummt. Dann tuppt mer sich die Fingre wund, wann mer so e Händi hat un an dem rum hantiert. Des is jo vill klenner wie der Läpi un es kummt vor, dass mer sich vertuppt.

Un jetz kummts: Nit genuch, dass se die Händis immer klenner gemacht han, dass se wahrscheinlich iwerall ninpasse. Jetz solls solchi gin, die sich „Smartfon“ nenne, also des is e Mobiltelefon, des schon fascht de Computer ersetzt. Es hat e arich empfindliche, wunerfitzliche Bildschirm, uf dem muss mer rum tuppe, wanns Telefon klingelt oder wann mer jemand anrufe will un ach wann mer ins Internet geht. Weil mer des jo mit sich schleppe muss, akar wuhin mer geht, han ich schun vill Leit gsiehn, die wu des Ding am Hals bamble han.

Mer muss kapiere

Un so e Ding soll ich mer anschaffe, des han mer mei Kiner gerot. Ich sin gar nit dervun ingsprengt, ich tupp nit gheere in der Effentlichkeit un han Ängschter, dass ich des nie im Lewe kapiere wer. Doch folgsam wie ich sin, war ich mol in so e Vodafone-Gschäft gang un han mich berote losse wille. Dort war so e freindliche junge Mann, der hat mer gleich drei Smartfone vorgeleet, eener teirer wie de anre. Un hat gered, grad wie e Wasserfall. Ich sin nit nohkumm un han mit dem seine Ausdruck nit gewisst, was anfang. Ufmol muss der jo bemerkt han, dass ich nix kapiert han. Er tut alli drei Telefone wieder zruck in die Schachtel, entschuldicht sich, dass er zu eener Sitzung muss un ich war froh, abhaue zu kenne.

Dervun kumm sin ich awer noch nit. Weil ich han angsaat kriet, wann die Kiner in Urlaub kumme, git e Smartfon angeschafft un ich gin solang inschtruiert, bis ich des Tuppe begriff han. Obwohl ich mich uf die Kiner gfrei, han ich e unwohles Gfiehl un will nix vun eem Smartfon wisse. Zwar han ich schun villes vun dere neiji Technik mitkriet, doch irgendwann streibt sich es Hernkaschtl dergeje un will in Ruh gelosst gin.